

**Talamdan sa
Mga Mensahe alang sa Full-time Training
sa Spring Term sa 2024**

**LINANGKOB NGA HISGOTANAN:
ANG MAHINUNGDANONG MGA PUNTO SA KAMATUORAN SA MGA SULAT NI PABLO—
IKADUHANG CORINTO**

Mensahe 13

Ang Pagpangalagad sa Bag-ong Tugon nga Nagsaad nga Ipaasawa Ta

Basahong Kasulatan: 2 Cor. 11:2-3

- I. Diosnong sugilanon sa gugma ang tibuok Biblia, rekord sa pagpangulitawo sa Dios sa Iyang pini-ling katawhan ug sa kapulihay pagpakigminyo kanila—Gen. 2:21-24; A. A. 1:2-4; Isa. 54:5; 62:5; Jer. 2:2; 3:1, 14; 31:32; Ezeq. 16:8; 23:5; Oseas 2:7, 19; Mat. 9:15; Juan 3:29; 2 Cor. 11:2; Efe. 5:25-32; Bug. 19:7; 21:2, 9-10; 22:17:**
- A. Sa makighigugmaay ta nga katawhan sa Dios Kaniya, madawat nato ang Iyang kinabuhi, maingon nga nadawat ni Eva ang kinabuhi ni Adam—Gen. 2:21-22.
 - B. Kining nag-agay, nagtransporma, ug nagtukod nga kinabuhi ang magpausa nato sa Dios ug mag-usa Niya kanato—vv. 9-12, 22.
 - C. Aron mausa ang Dios ug ang Iyang katawhan, maghigugmaay gyod sila—Oseas 11:4; Juan 14:21, 23; Exo. 20:6; Jer. 2:2; 31:3.
 - D. Sa mahigugma ang katawhan sa Dios Kaniya ug mogugol og panahon nga makig-ambitay Niya diha sa Iyang pulong, tuhopan sila sa Dios sa Iyang diosnong elemento, nga magpausa nila Kaniya isip kapikas Niya, nga sama Niya sa kinabuhi, kinaiya, ug pagpadayag—Sal. 119:140, 15-16; Efe. 5:25-27; 2 Cor. 3:18.
- II. Ang luwan ni apostol Pablo sa iyang pagpangalagad pagsaad man nga ipaasawa niya ni Cristo ang mga magtutuo—“Nangabugho ko alang ninyo sa pangabugho sa Dios; kay gikasaad na man mo nako nga ipaasawa sa usa ka bana aron ikapresentar mo nga putling ulay ngadto ni Cristo”—11:2:**
- A. Ang tumong sa pahiuili sa Ginoo pagpahiuli man ni Cristo nga bugtong-talagsaong Bana nga higugmaon nato; madani gyod unta ta ni Cristo, mahigugma ni Cristo, magtamod ni Cristo, ug magmahal ni Cristo.
 - B. Ang tinuod nga pagpangalagad sa Bag-ong Tugon kanunayng nagdasig nato nga mahigugma ni Ginoong Jesus sa unang gugma, naglig-on nato diha sa kayano sa pagkaon ug pagpahimulos ni Cristo nga kahoy sa kinabuhi aron masangkapan ta sa kinabuhi—2 Cor. 11:2-3; 3:3-6.
 - C. Ang mahigugma sa Ginoo sa unang gugma pagpauna man Kaniya sa tanang butang, mapugos sa Iyang gugma nga magtagad ug maghimo Niyang tanan sa atong kinabuhi—Bug. 2:4-5; Col. 1:18b; 2 Cor. 5:14-15; Mar. 12:30; Sal. 73:25-26.
 - D. Ang panghinapos nga pamulong ni Pablo sa Sulat ngadto sa mga taga-Efeso panalangin man sa grasya sa “tanang nahigugma sa atong Ginoong Jesucristo sa walay pagkadaot” (6:24); gisublisubli paggamit sa basahon sa Efeso ang pamulong *diha sa gugma*, nga puno gyod sa pagbati (1:4; 3:17; 4:2, 15-16; 5:2).
 - E. Ang tumong sa basahon sa Efeso pagdala man kanato nganha sa gugma, sa sulodnong pagkamao sa Dios, aron mapahimuslan nato ang Dios nga gugma ug ang Iyang presensya diha sa katam-is sa diosnong gugma ug sa ingon niana mahigugma sa uban sama sa gibuhat ni Cristo—1:15; 2:4; 3:19; 5:2, 25; 6:23; itandi sa 1 Juan 4:16-19.
 - F. Kay nibiya man ang iglesia sa Efeso, nga usa sa mga iglesia sa Asia, sa pagpangalagad ni apostol Pablo nga nagsaad nga ipaasawa ta (2 Tim. 1:15; Bug. 1:4a), gibiyaaan nila sa kapulihay ang ilang unang gugma ug nawad-an sa pagpahimulos ni Cristo nga kahoy sa kinabuhi (2:4-5, 7); ang pagkapakyas nila kalabot sa paghigugma nila sa Ginoo maoy nahimong labing dakong hinungdan sa pagkapakyas sa iglesia sa tanang kapanahonan (Mat. 24:12; Mar. 12:30-31; itandi sa Bug. 3:14-22; Dan. 7:25).

- G. Dunay upat ka dagkong punto sa sulat sa Ginoo sa iglesia sa Efeso sa Bugna 2:1-7; kining upat ka dagkong punto mao ang upat ka pulong nga nagsugod sa letrang *l—love (gugma), life (kinabuhi), light (kahayag), ug lampstand (tangkawan)*:
1. Paunahon gyod nato si Ginoong Jesus sa tanang bahin ug sa tanang butang aron mapahiuli ang unang gugma nato Kaniya; mapahimuslan dayon nato Siya nga kahoy sa kinabuhi, ug mahimong kahayag sa kinabuhi kining kinabuhia—Juan 8:12; Efe. 5:8-9, 13.
 2. Ang kahayag sa kinabuhi makapasidlak nato isip bulawang tangkawan, ang panghimatuod ni Jesus; kon mawala ang unang gugma nato sa Ginoo ug dili ta maghinulsol aron mobuhat sa unang mga buhat nga naggikan sa paghigugma nato sa Ginoo, kuhaon ang tangkawan gikan nato—Bug. 1:9-12, 20; 2:4-5.
 3. Nagsimbolo ang bulawang tangkawan sa Tulo-usang Dios—ang Amahan nga pagkamao gipakalawas diha sa Anak, ang Anak nga pagkalawas napadayag pinaagi sa Espiritu, hingpit nga naamgohan ang Espiritu ug napadayag ingon nga mga iglesia, ug ang mga iglesia mao ang panghimatuod ni Jesus—Exo. 25:31-40; Zac. 4:2-10; Bug. 1:10-12.
 4. Sa diosnong hunahuna, sa pagkatinuod buhi ug nagtubo nga kahoy ang bulawang tangkawan nga may mga pungango ug mga bulak sa almendra; busa, naghulagway ang tangkawan sa Tulo-usang Dios nga gipakalawas diha ni Cristo nga buhi, bulawang kahoy sa pagkabanhaw—nagtubo, nananga, namutot, ug namulak sa sulod nato, uban nato, pinaagi nato, ug gikan nato isip bunga sa kahayag (ang bunga sa Espiritu), nga maayog kinaiya, matarong og paagi, ug matuod og pagpadayag, aron madayag ang Dios ingon nga realidad sa adlaw-adlaw natong paggawi—Exo. 25:31, 3 Efe. 5:8-9; Gal. 5:22-23; Juan 12:36.

III. Ang pahiuili sa Ginoo pagpahiuili man sa paghigugma nato ni Ginoong Jesus sa unang gugma, sa labing maayong gugma, ug sa pagkaon nato ni Ginoong Jesus nga kahoy sa kinabuhi aron matukod ang organicong Lawas ni Cristo, nga mao ang pagtukod sa Bag-ong Jerusalem nga maoy tumong sa walay kataposang pamatigayon sa Dios—Bug. 2:4-5, 7; Efe. 4:15-16; Bug. 22:14:

- A. Ang pagkaon sa kahoy sa kinabuhi, sa ato pa, ang pagpahimulos nato ni Cristo nga sangkap nato sa kinabuhi, mao gyod untay unang butang sa iglesiahanong kinabuhi; “maayo kan-on” (Gen. 2:9) si Cristo nga kahoy sa kinabuhi aron mokaon ta Niya para makapahimulos ta ug maumol Niya aron mapadayag ang Dios (1:26; Juan 6:57, 63).
- B. Nag-agad sa pagpahimulos nato ni Cristo ang sulod sa iglesiahanong kinabuhi—labi tang magpahimulos Niya, labi sab nga modagaya ang sulod niini; apan aron makapahimulos ta ni Cristo higugmaon gyod nato Siya sa unang gugma; kon biyaan nato ang unang gugma nato Kaniya, dili ta makapahimulos ni Cristo ug mawad-an ta sa panghimatuod ni Jesus; tungod niana makuha kanato ang tangkawan—Bug. 2:4-5, 7.
- C. Aron makapahimulos ni Cristo nga kahoy sa kinabuhi, kanunay gyod tang moingon Niya nga, “Ginoong Jesus, gihigugma Ka nako”; kon duna tay nagdilaab nga gugma alang ni Ginoong Jesus, paunahon Siya sa tanang butang, makapahimulos ta sa tanang pagkamao Niya—1 Cor. 2:9; A. A. 1:1-4; 8:13-14.
- D. Ang pagtuo nato sa Ginoo pagdawat man Kaniya nga kinabuhi, ug ang paghigugma nato sa Ginoo pagpahimulos Kaniya nga kinabuhi, pagpahimulos sa persona mismo nga nadawat nato; gihatag sa Dios kanato ang pagtuo aron pinaagi niini madawat nato si Cristo nga kinabuhi nato; naggikan ang gugma nianang kahibulongang pagtuo ug makapakinabuhi nato sa tanang kadato sa Tulo-usang Dios diha ni Cristo nga atong kinabuhi—2 Ped. 1:1; Heb. 12:1-2a; 2 Cor. 4:13; Gal. 5:6; Juan 1:12-13; 21:15-17; Col. 3:4.
- E. Ang kinabuhi mismo nga nadawat nato sa dihang nituo ta ni Ginoong Jesus usa ka persona, ug ang bugtong paagi nga maaplikar ug mapahimuslan kining personaha mao ang paghigugma nato Kaniya sa unang gugma; kay persona man si Ginoong Jesus nga atong kinabuhi, gikinahanglan nato ang bag-ong pagkontak Kaniya aron makapahimulos ta sa Iyang presensya karon gyong tungora ug adlaw-adlaw—Juan 11:25; 14:5-6; 1 Tim. 1:14; Juan 14:21, 23; 2 Cor. 5:14-15; Bug. 2:4-7; Col. 1:18b.
- F. “Thatag ang imong kaugalingon nga mahigugma sa Ginoo. Walay laing paagi nga kusganon kaayo, ug walay laing paagi nga hilwas kaayo, dato kaayo, ug puno kaayo sa pagpahimulos. Higugmaa lang Siya. Ayaw pagtagad sa laing butang”—*Life and Building as Portrayed in the Song of Songs*, p. 21.
- G. Kon mahigugma ta Niya, ipadayag Niya ang Iyang Kaugalingon kanato, ug moanhi Siya ug ang Amahan kanato ug maghimo sa puluy-anan Nila uban nato (Juan 14:21, 23); busa mag-ampo gyod tag mga pag-

ampo sama sa: “Ginoo, ipakita kanako ang Imong gugma ug pugsa ko pinaagi sa Imong gugma aron mahigugma ko Nimo ug magkinabuhi nganha Nimo”; “Ginoo, pahigugmaa ko Nimo sa tanang panahon”; kanunay gyod natong ingnon ang Ginoo nga, “Ginoong Jesus, gihigugma Ka nako; Ginoo, ampingi ko diha sa Imong gugma! Daniha ko sa Imong Kaugalingon! Ampingi ko sa tanang panahon sa mahigugmaon Ni-mong presensya karon!”—A. A. 1:1-4.

H. Basi niini, makaawit ug makaampo ta—“Gihigugma Ka, di sa gugma ko, / Kay way ikahatag; / Gihi-gugma Ka’s gugmang Imoha, / Nabuhi ko ni’ni” (*Mga Alawiton*, #546, estansa 1); “Kon di Ikaw’ng higugmaon, / Di mi papahulayon; / Dawatang kasingkasing ko, / Kay nahigugma Nimo” (*Mga Alawiton*, #547, estansa 1).

IV. Sa pagsaad ni Pablo nga ipaasawa niya ni Cristo ang mga magtutuong taga-Corinto, nagpadayag siyang lalom nga kahangawa kanila—“Apan nahadlok ko nga tingali baya, ingon nga gilimbongan si Eva sa bitin sa iyang pagkamalalanon, mangadaot unya ang inyong mga hunahuna gikan sa kayano ug kaputli ngadto ni Cristo”—2 Cor. 11:3:

- A. Gipakasama ni Pablo ang laing mga pagtulon-an nga lahi sa bugtong-talagsaong pagtulon-an sa walay kataposang pamatigayon sa Dios sa malalangong pagpamulong sa bitin ni Eva sa Genesis 3:1-7; gipasimang sa bitin si Eva gikan sa kayano sa pagpahimulos sa kahoy sa kinabuhi ngadto sa makuti ug makapakuti nga kahoy sa kahibalo sa maayo ug sa daotan, nga mao ang kahoy sa kamatayon; ang kamatayon pagkabulag man gikan sa pagpahimulos sa Dios—Rom. 8:6.
- B. Sa Josue 9 nalimbongan ang mga anak sa Israel sa mga Gibeonhon kay sama man sila sa asawang nakalimot sa iyang bana; ang gibuhat nila dinhi pareha gyod kaayo sa gibuhat ni Eva sa Genesis 3; himoon gyod nato nga atong Bana ang Dios, magkinabuhi ta uban Niya, kanunayng magsalig Niya ug mausa Niya aron mapahimuslan Siya; batasanon gyod nato nga “magpatambag ni Jehova” (Jos. 9:14) ug “magpakisayod sa Iyang templo” (Sal. 27:4b), mangutana sa Dios kalabot sa tanang butang sa adlaw-adlaw natong kinabuhi.
- C. Ang laing mga pagtulon-an nga lahi sa bugtong-talagsaong pagtulon-an sa walay kataposang pamatigayon sa Dios makapabulag nato sa tinuod nga pagtamod, paghigugma, ug pagpahimulos sa bilihong persona ni Ginoong Jesucristo mismo nga atong Bana, kinabuhi, ug tanan—1 Tim. 1:3-5.
- D. Ang sekreto sa pag-ila sa tinuod nga pagpangalagad sa Bag-ong Tugon mao ra kini—bisan unsang magputol nato sa pagpahimulos sa Ginoo iya sa bitin, apan bisan unsang makapadako sa pagpahimulos nato sa Ginoo iya sa Espiritu ug sa pagpangalagad sa Bag-ong Tugon.
- E. Aron makakinabuhi sa realidad sa Lawas ni Cristo, pahimuslan gyod nato si Cristo sa paghigugma nato Kaniya sa kinahingpitan gyod, ug aron mahigugma Niya, luwason gyod ang atong mga hunahuna sa pagkatig-a (2 Cor. 3:14), pagkabuta (4:4), pagkamasupilon (10:4-5), ug pagkadunot (11:2-3).
- F. Moampo gyod ta nga, “Ginoo, susiha ug luwasa ang akong mga hunahuna aron matumong ra gyod kini Kanimong” (Sal. 139:23-24); aron maluwas ang atong mga hunahuna, ipatumong gyod nato ang atong salabotan sa espiritu, nga nagpasabot nga atimanon ug tagdon gyod nato ang atong espiritu (Rom. 8:6).
- G. Kita gyod unta ang mga naghunahuna “sa usa ka butang” (Fil. 2:2); ipunting gyod ang atong panghunahuna sa labaw nga pagkamaayo sa pagkaila ug pagsinati ug pagpahimulos kang Cristo; ang pagtagad ug laing butang makapalahi man sa atong panghunahuna, ug tungod niana makamugnag mga panagsumpaki sa atong taliwala; ang atong tumong mao ang kinahingpitang pagpahimulos ug kinahingpitang pagpakabaton kang Cristo (1 Cor. 1:10; Fil. 3:8-9, 14; 4:2).
- H. Ang usa ka butang, ang bugtong-talagsaong butang, diha sa pahiuili sa Ginoo mao ang walay kataposang pamatigayon sa Dios nga si Cristo maoy sentro ug uniberso—Col. 3:10-11:
1. Ang usa ka butang nga tingban sa pagtagad, hatagag gibug-aton, ug ipangalagad diha sa pahiuili sa Ginoo mao ang walay kataposang pamatigayon sa Dios—1 Tim. 1:3-4.
 2. Ang sulod sa walay kataposang pamatigayon sa Dios mao si Cristo; sa pagkatinuod, si Cristo mismo sa Iyang hingpit nga pagpangalagad sa tulo ka hugna mao ang diosnong pamatigayon (Juan 1:14; 1 Cor. 15:45b; Bug. 1:4; 3:1; 4:5; 5:6); tinguha sa Dios nga makabaton og pahiuili nga lunsay ug bug-os gyong iya sa persona ni Cristo (Col. 1:17b, 18b; 2 Cor. 12:2a; 2:10; 3:3).